

LORD CACHETE A VIAHA PA HULANDA DEN PURA...

Foto y Texto:Poets

DEN AMBIENTE



** Lamentablemente Lord Cachete su deseo no a ser completa pa ta presente den e jouvert morning, parada di San Nicolas y e parada grandi di Aruba su Carnaval 44 den Playa. Di fuentenan digno di credito, DEN AMBIENTE a ricibi e informacion cu diahuebs anochi Lord Cachete a viaha den pura y cu lagrimanan na wowo pa madre patria Hulanda. Esaki ta pa motibonan personal cual DEN AMBIENTE ta prefera pa no publica, ya cu aki ta trata di algo personal cu mester ser respeta. DEN AMBIENTE a tuma contacto cu Hildward Croes di Dushi Band, kende a keda di shock pa e noticia aki, debi cu Lord Cachete practicamente ta nan estrea durante e temporada aki di carnaval. E asunto aki a duele masha hopi mes ya cu e sa con duro Cachete a traha pa bin celebra su fiesta di Carnaval riba su dushi tera. Esaki ta di dos biaha cu Dushi Band ta perde su estrea prome cu e

paradanan culminante. Tabata dos aña pasa prome cu e paradanan, cu Teddy Philips formando parti di Dushi Band a viaha den un forma imprevisto pa Inglaterra net na e momentonan cu su roadmarch "Break Away" a cuminsa ta pega. Porcierto cu e roadmarch aki a resulta e roadjam di aña 1996 y hasta a logra puestonan clave riba diferente hitparadanan na fin di aña 1996.

Cachete tambe ta bay laga un tremendo roadmarch "Aruba Dushi Tera", aunke francamente bisa cu e lo no bay resulta como e roadjam di aña, pero si lo bay dal masha duro mes durante e grandioso celebracion di "Aruba Dag" na Hulanda.

Algo cu sigur a keda comproba cu participacion di Lord Cachete durante e Calypso & Roadmarch Contest ta un atraccion y cu a keda demostra cu e ta goza di un cariño y admiracion special serca su dushi publico Arubano.

"SHOW DI POETS" LO TA DIALUNA AWOR 11'OR AM..

** E programa farandulero "Show di Poets" lo no ta den aire awemerdia, pero lo ta mas cayente cu nunca dialuna awor pa 11'or am atraves di Cristal FM 101.7. Durante e programa aki lo anuncia e ganadornan di e dos grandioso parada di Aruba su Carnaval 44, tanto di San Nicolas como Oranjestad. Tambe e oyentenan por yama libremente y duna nan comentaronan. Lo bay tin varios premionan di sorpresa. E liñenan di comunicacion ta 827731 of 827726. Bo programa tan gusta "Show di Poets" ta desea bo un dushi carnaval cu yen di ambiente..

Pa prome biaha atraves di Cristal FM 101.7.. TOP 44 HIT CARNAVALESCO..



** Cristal FM su Automobil ta stabelize pa raspa e cobertura mas relevante den tur hanchi di Aruba..

** Awenochi pa exactamente 8'or pm despues di e parada di carnaval di San Nicolas, e dinamico dj Chando Colina lo presenta pa prome biaha aki na Aruba, TOP 44 di e hitnan carnavalesco. Esaki lo tuma lugar durante e transmision envivo for di nan traillel situa den L.G. Smith

BLV. Interesante lo bay ta cu tanto e publico riba caminda, automoblitanan y e oyentenan via e numbernan di telefoon, por vota pa nan hit carnavalesco favorito. For di momento cu e promocion a ranca sali, a keda demostra cu e interes pa e Top 44 hitnan carnavalesco ta hopi grandi mes.

Entre e autornan mes di e hitnan aki, ta reina un entusiasmo y emoshon masha grandi mes. Tur cos ta musta cu awenochi Cristal FM lo bay goza di un sintonia barbaro. Sin duda cu Cristal FM ta demostrando cu nan ta e radio di e generacion nobo y pa e hendenan moderno..

T.I.G.O. RUMBO PA CARNAVAL DI LOS TAQUES NA PUNTO FIJO..

** Aki por aprecia T.I.G.O. cual ta un foto cortesia di Robert Maduro..



** Dialuna awor despues di nos gran parada di carnaval e agrupacion musical T.I.G.O. lo sali rumbo pa Punto Fijo, Edo Falcon, Venezuela, na unda nan lo participa den e gran celebracion di e carnaval di Los Taques, cual lo tuma lugar durante e dos dianan 23 y 24 di Februari.

Dia 25 T.I.G.O. lo ta actuando den un fiesta priva pa despues e mainta siguiente bolbe Aruba. E popular cantante di T.I.G.O.

Robert Maduro, a declara na DEN AMBIENTE cu nan ta sumamente contento cu e invitacion aki y cu despues e agrupacion a pasa den un reorganizacion total tur cos ta canando fantasticamente cu e banda.

Actualmente T.I.G.O. ta consisti di siete integrante y nan ta moviendo hopi bon den presentacionnan publico. Porcierto durante e temporada aki di carnaval T.I.G.O. a haci un tremendo

trabao, tanto durante e calypso & roadmarch contest como tambe durante e diferente paradanan.

E motibo cu T.I.G.O. a haya e invitacion aki ta debi na e bon impresion cu nan a laga despues di nan tremendo presentacion na november 1997 durante e desfile inaugural di "La Feria de la Chinita" na Maracaibo, cual tabata un invitacion di Alcaldia di Maracaibo y Consulado venezolano aki na Aruba.